

ZAKON O SUKOBU INTERESA U INSTITUCIJAMA VLASTI BOSNE I HERCEGOVINE

Prvo poglavlje – Sukob interesa

Član 1

Opće odredbe

1. Ovim Zakonom uređuju se posebne obaveze izabranih zvaničnika, nosilaca izvršnih funkcija i savjetnika u institucijama vlasti BiH u obavljanju dužnosti.
2. Izabrani zvaničnici, nosioci izvršnih funkcija i savjetnici koji obavljaju javne funkcije trebaju se ponašati savjesno i odgovorno, da ne ugrožavaju povjerenje i pouzdanje građana, te da poštuju kako zakonske tako i druge propise kojima se određuju prava, obaveze i odgovornosti u obavljanju javnih funkcija.
3. U obavljanju javne dužnosti izabrani zvaničnici, nosioci izvršnih funkcija i savjetnici se moraju pridržavati etike poziva i funkcije koju obavljaju.
4. U obavljanju javne funkcije izabrani zvaničnici, nosioci izvršnih funkcija i savjetnici ne smiju svoj privatni interes stavljati iznad javnog interesa.
5. Sukob interesa postoji u situacijama u kojima izabrani zvaničnici, nosioci izvršnih funkcija i savjetnici imaju privatni interes koji utiče ili može uticati na zakonitost, otvorenost, objektivnost i nepristranost u obavljanju javnih funkcija.

Član 2.

Principi djelovanja

1. Izabrani zvaničnici, nosioci izvršnih funkcija i savjetnici u obavljanju javnih funkcija moraju postupati zakonito, efikasno, nepristrano, časno, te se pridržavati principa odgovornosti, poštenja, savjesnosti, otvorenosti i vjerodostojnosti.
2. Izabrani zvaničnici, nosioci izvršnih funkcija i savjetnici su lično odgovorni za svoje djelovanje u obavljanju javnih funkcija na koje su imenovani, odnosno izabrani, i politički su odgovorni prema tijelu ili građanima koji su ih imenovali ili izabrali.
3. Izabrani zvaničnici, nosioci izvršnih funkcija i savjetnici ne smiju koristiti javnu funkciju za ličnu dobit osobe koja je s njima povezana. Zvaničnici ne smiju biti ni u kakvom odnosu zavisnosti prema osobama koje bi mogle uticati na njihovu objektivnost.
4. Izabrani zvaničnici, nosioci izvršnih funkcija i savjetnici kao javne osobe moraju djelovati u interesu građana.

5. U obavljanju funkcija izabrani zvaničnici, nosioci izvršne funkcije i savjetnici obavezni su imovinu, sredstva za rad i finansijska sredstva koja su im povjerena koristiti isključivo u svrhu za koja su namijenjena i na efikasan način.

6. Izabrani zvaničnici, nosioci izvršne funkcije i savjetnici u vrijeme obavljanja javne funkcije primaju platu i naknade za funkciju koju obavljaju. Osim ako je to ovim Zakonom izričito propisano izabrani zvaničnici, nosioci izvršne funkcije i savjetnici ne smiju primati nikakvu drugu naknadu.

Član 3.

Definicije

1. U smislu ovog Zakona o sukobu interesa:

a) *Ovlaštenom osobom* smatra se osoba koja je Osnivačkim aktom ili Statutom preduzeća ovlaštena da predstavlja preuzeće. Pod ovlaštenom osobom se takođe podrazumijeva i poduzetnik;

b) ***Bliskim srodnikom*** smatraju se bračni ili izvanbračni drug zvaničnika, njegovi srodnici po krvi u ravnoj lozi, usvojitelj i usvojenik, srodnici u pobočnoj liniji do trećeg stepena i srodnik po tazbini do drugog stepena.

c) *Izabranim zvaničnicima* smatraju se;

- članovi Predsjedništva Bosne i Hercegovine;

- poslanici i članovi Parlamentarne skupštine Bosne i Hercegovine (u daljem tekstu BiH);

- sekretari oba doma Parlamentarne skupštine BiH;

- direktori, zamjenici i pomoćnici direktora organa državne uprave, agencija i direkcija, te zavoda imenovani od strane Vijeća ministara BiH ili Parlamentarne skupštine BiH odnosno Predsjedništva BiH;

d) *Nosiocima izvršnih funkcija* smatraju se ministri i zamjenici ministara u Vijeću ministara BiH;

e) *Savjetnicima* smatraju se savjetnici izabranim zvaničnicima i nosiocima izvršnih funkcija kako je utvrđeno Zakonom o državnoj službi u institucijama vlasti BiH;

f) *Izborna komisija* znači Izborna komisija Bosne i Hercegovine.

g) *Finansijski interes* znači:

1. svaki interes kojim se izabranom zvaničniku, nosiocu izvršne funkcije ili savjetniku omogućava da primi novac u vrijednosti većoj od hiljadu konvertibilnih maraka (1.000 KM) godišnje, kao i

2. svaki vlasnički interes koji ima izabrani zvaničnik, nosilac izvršne funkcije ili savjetnik, koji odgovara vrijednosti od najmanje deset hiljada konvertibilnih maraka (10.000 KM) u nekom preduzeću, društvu sa

neograničenom odgovornošću, komanditnom društvu, dioničarskom društvu ili društvu sa ograničenom odgovornošću.

h) poklon znači svaku isplatu, djelovanje, uslugu, ili predmet od vrijednosti učinjene neposredno primaocu, bez naknade ili očekivanja naknade. Pokloni primljeni od strane članova porodice, kao i pokloničija vrijednost ne prelazi stotinu konvertibilnih maraka (100 KM) nisu obuhvaćeni ovim Zakonom.

i) Privatno preduzeće označava svako zakonom utvrđeno preduzeće koje nije javno preduzeće definirano u daljem tekstu.

j) Javno preduzeće označava preduzeće u kojem se više od 25% kapitala nalazi u vlasništvu Vlade odnosno preduzeće u kojem se više od 25% godišnje poslovne aktivnosti financira iz proračuna Vlada Bosne i Hercegovine, Federacije Bosne i Hercegovine, Republike Srpske, Distrikta Brčko, bilo kojeg kantona, općine ili grada.

Član 4.

Nespojivosti

1. Članstvo u poslovodnom odboru, upravnom odboru, nadzornom odboru, izvršnom odboru, ili u svojstvu ovlaštene osobe u javnom preduzeću nespojivo je sa javnim funkcijama izabranog zvaničnika, nosioca izvršne funkcije ili savjetnika.

2. Članstvo u poslovodnom odboru ili direkciji, ili obavljanje funkcije direktora agencije za privatizaciju nespojivo je sa javnim funkcijama izabranog zvaničnika ili nosioca izvršne funkcije.

3. Angažman u privatnom preduzeću, u uslovima u kojima se stvara sukob interesa, nespojiv je sa javnim funkcijama izabranog zvaničnika, nosioca izvršne funkcije ili savjetnika.

4. Pod uslovima definiranim u stavu 1., 2. i 3. ovog člana angažman bliskih srodnika izabranih zvaničnika, nosilaca izvršnih funkcija i savjetnika takođe dovodi do situacije u kojoj za ove zvaničnike, nosioce izvršnih funkcija i savjetnike dolazi do pojave sukoba interesa.

Član 5.

Javna preduzeća i agencije za privatizaciju

1. Izabrani zvaničnici, nosioci izvršnih funkcija i savjetnici ne mogu biti članovi poslovodnog odbora, upravnog odbora, nadzornog odbora, izvršnog odbora, niti biti u svojstvu ovlaštene osobe u javnom preduzeću. Ova odredba se primjenjuje godinu dana nakon što zvaničnici, nosioci izvršnih funkcija i savjetnici prestanu vršiti funkciju.

2. Izabrani zvaničnici, nosioci izvršnih funkcija i savjetnici ne mogu biti članovi direkcije ni upravnog odbora, niti direktori agencija za privatizaciju. Ova odredba se primjenjuje godinu dana nakon što zvaničnici, nosioci izvršnih funkcija i savjetnici prestanu vršiti funkciju.

3. Izabrani zvaničnici, nosioci izvršnih funkcija i savjetnici moraju podnijeti ostavku na svaku od tih nespojivih službi prije preuzimanja funkcije.

Član 6.

Vladina ulaganja u privatna preduzeća

1. Izabrani zvaničnici, nosioci izvršnih funkcija i savjetnici ne mogu biti članovi poslovnog odbora, upravnog odbora, nadzornog odbora, izvršnog odbora, niti biti u svojstvu ovlaštene osobe svakog privatnog preduzeća u koje je organ vlasti, čiji je član zvaničnik, nosilac izvršne funkcije ili savjetnik, ulagao kapital u periodu od četiri (4) godine prije preuzimanja funkcije zvaničnika, nosioca izvršne funkcije ili savjetnika.

2. Izabrani zvaničnici, nosioci izvršnih funkcija i savjetnici ne mogu biti članovi poslovnog odbora, upravnog odbora, nadzornog odbora, izvršnog odbora, niti biti u svojstvu ovlaštene osobe bilo kojeg privatnog preduzeća koje sklapa ugovore, ili na drugi način posluje, sa vladama na bilo kojem nivou. Ova odredba primjenjuje se samo na privatna preduzeća koja su sklopila ugovor ili posluju sa Vladom, dok je izabrani zvaničnik, nosilac izvršne funkcije ili savjetnik vršio funkciju i to samo onda kada je vrijednost ugovora ili posla sa Vladom veća od pet hiljada konvertibilnih maraka (5.000 KM) godišnje.

Član 7.

Zabrana djelovanja u slučaju sukoba interesa

1. Izabrani zvaničnici ne mogu glasati po bilo kojem pitanju koje se direktno tiče privatnog preduzeća u kojem taj zvaničnik ili njegovi bliski srodnici imaju finansijski interes. Zvaničnici koji se nađu u takvim situacijama uzdržat će se od glasanja, te na otvorenoj sjednici objasniti razloge zbog kojih su uzdržani.

2. Nosioci izvršnih funkcija i savjetnici neće poduzimati nikakve službene radnje koje bi mogle direktno uticati na privatno preduzeće u kojem nosilac izvršne funkcije ili savjetnik, ili njegov bliski srodnik imaju finansijski interes. Nosioci izvršnih funkcija i savjetnici će u takvim situacijama prosljediti donošenje odluke o poduzimanju radnje drugom nadležnom tijelu i pismeno navesti razloge za takvo prosljeđivanje.

Član 8.

Ugovori o ličnim uslugama

1. Izabrani zvaničnici, nosioci izvršnih funkcija i savjetnici ne mogu sklapati ugovore o pružanju ličnih usluga sa bilo kojim javnim preduzećem.

2. Izabrani zvaničnici, nosioci izvršnih funkcija i savjetnici ne mogu sklapati ugovore o pružanju ličnih usluga sa bilo kojim privatnim preduzećem koje sklapa ugovore, ili na drugi način posluje sa vladama na bilo kojem nivou. Ova odredba se samo primjenjuje na privatna preduzeća koja su sklopila ugovor ili posluju s Vladom istovremeno dok izabrani zvaničnik, nosilac izvršne funkcije ili savjetnik vrši funkciju

i samo onda kada vrijednost ugovora ili posla s Vladom prelazi pet hiljada (5.000) konvertibilnih maraka godišnje.

3. U slučaju da izabrani zvaničnik, nosilac izvršnih funkcija ili savjetnik prekrši odredbe ovog člana, ugovor zvaničnika ili nosioca izvršnih funkcija smatraće se ništavnim.

Član 9.

Zabranjena aktivnosti

1. Osim ako je to izričito propisano odredbama ovoga Zakona, zvaničnicima se zabranjuje:

- a) primiti ili zahtijevati poklon ili drugu korist ili obećanje poklona ili druge koristi radi obavljanja javnih funkcija;
- b) primiti dodatnu naknadu za poslove vršenja javnih funkcija;
- c) tražiti, prihvatiti ili primiti vrijednost ili uslugu radi glasanja o bilo kojem pitanju ili uticati na odluku nekog tijela ili osobe;
- d) obećavati zaposlenje ili neko drugo pravo u zamjenu za poklon ili obećanje poklona;
- e) privilegovati osobe radi stranačkog ili drugog opredjeljenja ili radi porijekla, ličnih ili porodičnih veza;
- f) odbiti izvšenje uvida u svoje finansijsko poslovanje;
- g) uticati na dobivanje poslova ili narudžbi države u cilju sticanja materijalne ili nematerijalne koristi za sebe ili za drugoga;
- h) koristiti povlaštene informacije o radu državnih tijela radi lične koristi ili koristi bliskog srodnika;
- i) na drugi način koristiti svoj položaj kako bi uticali na odluku zakonodavne, izvršne ili sudske vlasti te tako postigli ličnu korist ili korist bliskog srodnika, neku povlasticu ili pravo, sklopili pravni posao ili na drugi način interesno pogodovali sebi ili drugom bliskom srodniku.

Član 10.

Primanje poklona

1. Poklonom u smislu ovoga Zakona smatra se poklon u vezi sa obavljanjem dužnosti, a podrazumijeva: novac, stvari, prava, usluge bez naknade te neku drugu korist datu ili obećanu zvaničniku, na primjer: ugostiteljska usluga, usluga noćenja, oprost duga ili obaveze, putni trošak ili slična usluga, ulaznica, umjetnički predmet, suvenir, osiguranje ili slična usluga, medicinska ili slična usluga koju zvaničnik nije lično platio prema tržišnoj cijeni.

2. Poklon u vrijednosti do 50 KM izabrani zvaničnici, nosioci izvršne funkcije i savjetnici mogu zadržati i ne trebaju ga prijaviti.
3. Poklonom u smislu st. 2. ovoga člana smatra se i više poklona poklonjenih od strane iste osobe u razdoblju od jedne godine.
4. Poklone iznad vrijednosti iz stava 2. ovoga člana izabrani zvaničnici, nosioci izvršne funkcije i savjetnici ne smiju zadržati, već su ih obavezni prijaviti Izornoj komisiji i oni postaju vlasništvo BiH.
5. Izabrani zvaničnik, nosilac izvršne funkcije i savjetnik ne smije primiti novac, ček ili drugi vrijednosni papir bez obzira na iznos, a ako dobije navedeno dužan ih je prijaviti i oni postaju vlasništvo BiH.
6. U slučaju sumnje o vrijednosti poklona izabrani zvaničnik, nosilac izvršne funkcije i savjetnik dužan je zatražiti račun od davaoca poklona.
7. Vrijednost poklona je njegova tržišna vrijednost.
8. Primanje poklona prema stavovima 1. do 8. ovoga člana odnosi se i na osobe koje bi primile poklona u korist zvaničnika, s tim da takva osoba zna za primanje poklona.

Član 11.

Obavljanje drugih poslova zvaničnika

1. Za vrijeme vršenja javne funkcije izabrani zvaničnici, nosioci izvršne funkcije i savjetnici, osim dužnosti u političkoj stranci, ne smiju vršiti dužnost u drugim izvršnim organima. Istovremeno vršenje više od jedne funkcije u izvršnim organima takođe je nespojivo.
2. Izabrani zvaničnici, nosioci izvršne funkcije i savjetnici mogu obavljati poslove u nastavnim ili naučnim, te kulturnim i sportskim ustanovama, stručnim udruženjima i slično, samo pod uslovom da naknada za obavljanje tih dužnosti ne prelazi jednu trećinu iznosa redovne plate u ovim ustanovama ili udruženjima.
3. Izabrani zvaničnici i nosioci izvršne funkcije ne smiju obavljati poslove savjetnika niti smiju biti u ugovornom odnosu na osnovu rada sa javnim preduzećima i pravnim ili fizičkim osobama koji posluju sa tijelima vlasti na bilo kojem nivou.

Drugo poglavlje – Otvorenost

Član 12.

Lično finansijsko stanje

1. Izabrani zvaničnici, nosioci izvršnih funkcija i savjetnici dostavljaju redovne finansijske izvještaje, kako je predviđeno zakonom i Pravilima i propisima Izborne komisije.

Član 13.

Otvorenost kod ugovaranja

1. Svako javno ili privatno preduzeće koje dostavi ponudu o davanju roba ili usluga Vladi podnosi i pisanu izjavu zajedno sa ponudom, uz spisak bilo kakvih priloga političkim strankama koje je preduzeće dalo u prethodne dvije godine. U izjavi se takođe navode svi izabrani zvaničnici, nosioci izvršnih funkcija i savjetnici koji su bili zaposleni ili su bili članovi poslovnog odbora, upravnog odbora, nadzornog odbora, izvršnog odbora, ili su radili u svojstvu ovlaštene osobe preduzeća tokom prethodne dvije godine.
2. Ovaj član primjenjuje se samo na javna ili privatna preduzeća kada vrijednost ugovora ili posla za Vladu prelazi pet hiljada (5.000) konvertibilnih maraka godišnje.
3. Sve izjave iz ovog člana su javni dokumenti i dostupni su javnosti i medijima i od strane preduzeća i od strane organa vlasti koji prima ponudu.

Član 14.

Otvorenost informacija o preduzeću

1. Svako preduzeće u koje organ vlasti izvrši jedno ili više ulaganja u ukupnom iznosu većem od pet hiljada (5.000) konvertibilnih maraka godišnje, podnosi izvještaj u kojem se navode puna imena, adrese, kontakt telefoni članova poslovnog odbora ili upravnog odbora, kao i svih ovlaštenih osoba u preduzeću.
2. Takvi izvještaji se dostavljaju ministarstvu ili agenciji nadležnoj za finansijska pitanja u okviru organa vlasti koji je izvršio ulaganje, sudu kod kojeg je preduzeće registrirano, i Izornoj komisiji u roku od 10 dana od izglasavanja službene odluke preduzeća da izvrši ulaganje.
3. Ažurirani izvještaji se dostavljaju u roku od četrnaest dana (14) od bilo kakve promjene u članstvu poslovnog odbora, upravnog odbora, nadzornog odbora, izvršnog odbora, ili ovlaštenih osoba u periodu od dvije godine nakon posljednjeg ulaganja od strane organa vlasti.
4. Svi izvještaji iz ovog člana su javni dokumenti i dostupni su za inspekciju i kopiranje odgovarajućem ministarstvu ili agenciji koja je nadležna za finansijska pitanja, sudu i Izornoj komisiji za vrijeme redovnog radnog vremena.

Član 15.

Otvorenost Vladinih investicija

1. Organ vlasti koji izvrši jedno ili više ulaganja u neko preduzeće u ukupnom iznosu većem od pet hiljada (5.000 KM) konvertibilnih maraka godišnje, podnosi izjavu o tom ulaganju Izornoj komisiji.

2. Organ vlasti takođe objavljuje primjerak izjave o ulaganju u novinama koje se distribuiraju na teritoriji koja je u njegovoj nadležnosti. Primjerak se objavljuje u roku od 14 dana od dana kada je izvršeno ulaganje.

3. Sve izjave iz ovog člana su javni dokumenti i dostupni su za inspekciju i kopiranje od strane organa vlasti i Izborne komisije tokom redovnog radnog vremena.

Član 16.

Otvorenost godišnjih izvještaja preduzeća

1. Godišnji finansijski izvještaji preduzeća koja se dostavljaju nadležnoj poreskoj upravi, takođe se dostavljaju agenciji ili ministarstvu nadležnom za finansijska pitanja u organu vlasti koji je izvršio ulaganje u preduzeće tijekom prethodnih dvanaest (12) mjeseci.

2. Svi izvještaji iz ovog člana su javni dokumenti i dostupni su za inspekciju i kopiranje od strane odgovarajućeg ministarstva ili agencije nadležne za finansijska pitanja tokom redovnog radnog vremena.

Treće poglavlje – Implementacija

Član 17.

Implementacija

1. Izborna komisija u skladu sa ovim Zakonom obavlja slijedeće funkcije:

a) djeluje na osnovu ovog Zakona kako bi osigurala političku odgovornost i vjerodostojnost izabranih zvaničnika, nosilaca izvršne funkcije i savjetnika, vodeći računa o zaštiti integriteta funkcije, a ne osobe koja vrši tu funkciju;

b) donosi upute, propisuje obrasce i organizaciju registra radi primjene odredbi ovog Zakona;

c) donosi Pravilnik o vođenju registra, obrascima, pravila o vođenju postupka i dostavljanju odluka, te sastavljanju izvještaja;

d) donosi odluke o tome da li neko djelovanje ili propust predstavljaju kršenje odredbi ovoga Zakona;

e) podnosi izvještaj o svome radu Predsjedništvu Bosne i Hercegovine svakih šest mjeseci, a javnosti najmanje jednom godišnje.

f) podnosi izvještaj nadležnom tužilaštvu o svakom slučaju kršenja ovog Zakona koje može predstavljati kršenje Krivičnog zakona.

2. Dodatna sredstva koja Izborna komisija potroši u implementaciji ovog Zakona se obezbjeđuju iz državnog budžeta.

Član 18.

Postupak pred Izbornom komisijom

1. Postupak pred Izbornom komisijom se pokreće na zahtjev Izborne komisije ili na zahtjev osobe o kojoj se radi.

2. Izborna komisija može pokrenuti postupak i na osnovu prijave neke druge osobe.

3. Izborna komisija ima pravo utvrditi činjenice vlastitom istragom ili pribaviti činjenice i dokaze djelovanjem drugih tijela izvršne vlasti. Svi organi vlasti, institucije i sudovi na svim nivoima u BiH su obavezni da Izornoj komisiji pruže zatraženu pravnu pomoć i sve druge vidove pomoći.

4. Izborna komisija će o slučaju sumnje o postojanju kršenja obaveze prema ovom Zakonu obavijestiti datu osobu za koju postoji osnovana sumnja da je prekršila ovaj Zakon, tražeći od nje izjavu o navodima sadržanim u prijavi.

5. Ako postoji sumnja u vezi s mogućim postojanjem kršenja ovog Zakona, Izborna komisija će dati svoje mišljenje na zahtjev svake osobe koja to od nje zatraži.

6. Prije izricanja sankcije Izborna komisija mora izjavu osobe na koju se sankcija odnosi.

Član 19.

Žalbe

1. Žalbe na odluke Izborne komisije mogu se uputiti Upravnom odjelu Suda Bosne i Hercegovine.

Član 20.

Sankcije

1. Ako se utvrdi da neki izabrani zvaničnik, nosilac izvršne funkcije ili savjetnik krši odredbe člana 5., 6. ili 8. ovog Zakona, on se smatra se nepodobnim da se kandidira za bilo koju neposredno ili posredno izabranu funkciju u periodu od četiri (4) godine nakon što je prekršaj ustanovljen. Pored toga, zvaničnik, nosilac izvršne funkcije ili savjetnik

može biti novčano kažnjen u iznosu ne manjem od hiljadu konvertibilnih maraka (1.000 KM) i ne većem od deset hiljada konvertibilnih maraka (10.000 KM).

2. Ako se utvrdi da neki izabrani zvaničnik, nosilac izvršne funkcije ili savjetnik krši odredbe čl. 9. i 10. taj zvaničnik ili nosilac izvršne funkcije kažnjava se novčano u iznosu ne manjem od hiljadu konvertibilnih maraka (1.000 KM) i ne većem od deset hiljada konvertibilnih maraka (10.000 KM). Zvaničnik, nosilac izvršne funkcije ili savjetnik takođe ima obavezu da vrati poklon ili novac koji je ekvivalentan vrijednosti poklona.

3. Ako se utvrdi da izabrani zvaničnik, nosilac izvršne funkcije ili savjetnik krši odredbe čl. 1., 5., 6., 7., 8., 9. i 10. ovog Zakona, on se smatra nepodobnim za radno mjesto u državnoj upravi ili za mjesto savjetnika u periodu od najviše četiri (4) godine nakon počinjenog prekršaja. Ova odredba se takođe primjenjuje na izabranog zvaničnika, nosioca izvršne funkcije ili savjetnika na dopustu sa radnog mjesta u državnoj upravi. U tom slučaju, on je dužan proći postupak javnog konkursa kako bi ponovo stupio u državnu upravu po isteku perioda nepodobnosti.

4. Ako se ustanovi da bliži srodnik izabranog zvaničnika, nosioca izvršne funkcije ili savjetnika krši odredbu člana 10., taj član porodice kažnjava se novčano u iznosu ne manjem od hiljadu konvertibilnih maraka (1.000 KM) i ne većem od deset hiljada konvertibilnih maraka (10.000 KM). Zvaničnik, nosilac izvršne funkcije ili savjetnik takođe može biti novčano kažnjen u jednakom iznosu ako se utvrdi da mu je ranije bilo poznato postojanje sukoba interesa ili poklona.

5. Svako preduzeće za koje se utvrdi da krši član 13., 14. ili 16. kažnjava se novčano u iznosu ne manjem od hiljadu konvertibilnih maraka (1.000 KM) i ne većem od dvadeset hiljada konvertibilnih maraka (20.000 KM) i nema pravo sklapati ugovor sa bilo kojim organom vlasti ili agencijom u periodu od četiri (4) godine nakon počinjenog prekršaja.

6. Novčane kazne na osnovu ovog poglavlja plaćaju se Izornoj komisiji.

Član 21. – Zastarjevanje

1. Postupak za primjenu sankcija u vezi s kršenjem ovog Zakona mora se pokrenuti u roku od četiri godine od utvrđivanja navodnog kršenja Zakona.

Četvrto poglavlje – Obim Zakona

Član 22.

Primjena Zakona na entitete i Distrikt Brčko

1. Entiteti i Distrikt Brčko će donijeti svoje zakone u roku od 60 dana od dana stupanja na snagu ovog Zakona.

2. Do donošenja zakona u oblasti sukoba interesa na entitetskom nivou i nivou Distrikta Brčko, entiteti i Distrikt Brčko će primjenjivati odredbe utvrđene u ovom Zakonu.

3. Odredbe zakona iz stava 1. ovog člana ne smiju biti u suprotnosti sa ovim Zakonom.

Peto poglavlje – Prelazne i završne odredbe

Član 23.

Stupanje na snagu

1. Zakon stupa na snagu jedan dan nakon objavljivanja rezultata Izborâ koji će se održati u oktobru 2002. godine.

2. Zakon će biti objavljen u Službenom glasniku Bosne i Hercegovine i službenim glasilima entiteta i Distrikta Brčko.